

VIBOR HANDŽIĆ  
Delegat u Domu naroda  
Parlamenta Federacije Bosne i Hercegovine

Sarajevo, 18.7.2022. godine

PARLAMENT FEDERACIJE  
BOSNE I HERCEGOVINE  
DOM NARODA  
n/r gđin Tomislav Martinović, predsjedavajući

Bosna i Hercegovina  
Federacija Bosne i Hercegovine  
**PARLAMENT FEDERACIJE**  
SARAJEVO


Primijeno: 18-07-2022			
Org. jed.	Broj	Priloga	Vrijednost
02	-02-	1525	122

**PREDMET: NACRT ZAKONA O ZAŠTITI OD NASILJA U PORODICI**

Na osnovu člana 155. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03, 21/09 i 24/20), kao ovlaštenu predlagač, podnosim, radi razmatranja i donošenja **NACRT ZAKONA O ZAŠTITI OD NASILJA U PORODICI**

Delegat:

VIBOR HANDŽIĆ



**NACRT**  
**ZAKONA O ZAŠTITI OD NASILJA U PORODICI**

**Sarajevo, juli 2022. godine**

# ZAKON

## O ZAŠTITI OD NASILJA U PORODICI

### I – OSNOVNE ODREDBE

#### Član 1. (Predmet Zakona)

Zakonom o zaštiti od nasilja u porodici (u daljem tekstu: Zakon) uređuje se zaštita od nasilja u porodici, osobe koje se u smislu ovog zakona smatraju članovima porodice, subjekti zaštite, postupak zaštite žrtava nasilja u porodici i mjere za zaštitu od nasilja u porodici, uloga fondacija i udruženja u sistemu zaštite žrtava nasilja u porodici (u daljem tekstu: specijalizirane nevladine organizacije) te međusobna povezanost svih subjekata koji su u funkciji zaštite od nasilja u porodici i druga pitanja od značaja za zaštitu od nasilja u porodici.

#### Član 2. (Cilj Zakona)

Osnovni cilj ovog zakona je zaštita žrtava nasilja u porodici prevencijom i suzbijanjem nasilja u porodici, kojim se krše ustavom i zakonima zagaranirana ljudska prava i slobode.

#### Član 3.

Djelatnost zaštite od nasilja u porodici je od javnog interesa za Federaciju i kantone.

#### Član 4. (Opći principi pružanja zaštite)

Principi zaštite od nasilja u porodici uređeni ovim zakonom i drugim propisima, kao i međunarodni standardi koje je prihvatila Bosna i Hercegovina koji uređuju oblast nasilja u porodici, primjenjivat će se u svim slučajevima radi osiguranja najdjelotvornije zaštite za žrtve nasilja u porodici.

Primjenu i provođenje ovog zakona u skladu sa svojim nadležnostima osigurat će općinski sud – prekršajno odjeljenje suda (u daljnjem tekstu: nadležni sud), policija, organ starateljstva i druge institucije nadležne za socijalnu i zdravstvenu zaštitu i specijalizirane nevladine organizacije, uz obavezu zajedničkog i koordiniranog djelovanja.

Institucije iz stava 2. ovog člana trebaju osigurati da postupanja sa žrtvama nasilja i nasilnim osobama vrše uposlenici educirani za rad s navedenim osobama.

#### Član 5. (Ostvarivanje prava)

Zaštita od nasilja u porodici ostvaruje se primjenom ovog zakona i drugih propisa kojima se uređuje ostvarivanje prava žrtava nasilja u porodici.

Član 6.  
(Značenje izraza)

Izrazi koji su radi preglednosti dani u jednom gramatičkom rodu u ovome zakonu se bez diskriminacije odnose i na muškarce i na žene.

## II – POJMOVI I ZNAČENJE IZRAZA

Član 7.  
(Nasilje u porodici)

- 1) Nasilje u porodici, u smislu ovog zakona, postoji ukoliko postoji osnov sumnje da je član porodice izvršio radnje fizičkog, seksualnog, psihičkog i/ili ekonomskog nasilja, zanemarivanja, kao i prijetnje koje izazivaju strah od fizičke, seksualne, psihičke i/ili ekonomske štete kod drugog člana porodice.
- 2) Radnje nasilja u porodici, u smislu stava 1. ovog člana su:
  - a) primjena sile na fizički ili psihički integritet člana porodice;
  - b) postupanje koje može prouzrokovati ili izazvati opasnost da će prouzrokovati fizičku ili psihičku bol ili patnju člana porodice;
  - c) prouzrokovanje straha ili osobne ugroženosti ili povrede dostojanstva člana porodice ucjenom ili drugom prinudom;
  - d) prijetnja nanošenjem tjelesne povrede članu porodice ili njemu bliskoj osobi;
  - e) prijetnja oduzimanjem djece ili izbacivanjem iz stana člana porodice;
  - f) fizički napad člana porodice na drugog člana porodice bez obzira na to da li je nastupila fizička povreda ili nije;
  - g) verbalni napad, vrijeđanje, psovanje, nazivanje pogrdnim imenima, te drugi način grubog uznemiravanja člana porodice;
  - h) seksualno nasilje ili uznemiravanje;
  - i) praćenje, uhođenje i svi drugi slični oblici uznemiravanja drugog člana porodice;
  - j) namjerno oštećenje, uništenje ili prometovanje zajedničke imovine ili imovine u posjedu, kao i oštećenje ili uništenje imovine u vlasništvu ili u posjedu drugog člana porodice;
  - k) oduzimanje ili uskraćivanje prava na ekonomsku nezavisnost zabranom rada ili držanjem člana porodice u odnosu zavisnosti ili podređenosti;
  - l) zanemarivanje djece u njihovom odgoju ili vaspitanje djece na način ponižavajućeg postupanja;
  - m) zanemarivanje starih ili iznemoglih osoba u njihovom njegovanju i liječenju;
  - n) ograničavanje slobode komuniciranja člana porodice s drugim članovima porodice ili drugim osobama;
  - o) nasilna izolacija ili ograničenje slobode kretanja člana porodice;
  - p) onemogućavanje pristupa zdravstvenoj zaštiti i njezi;
  - r) oduzimanje djece ili izbacivanje iz stana člana porodice;
  - s) iscrpljivanje radom, izgladnjivanje, uskraćivanje sna ili neophodnog odmora članu porodice;
  - t) nepridržavanje odluke nadležnog organa ili suda kojim je utvrđen osobni kontakt djece s roditeljem s kojim dijete ne živi;
  - u) zadržavanje putne isprave ili nekog drugog dokumenta člana porodice;
  - v) svaka druga radnja koja predstavlja nasilje u porodici.
- 3) Pod radnjom nasilja u porodici smatraju se i prijetnje radnjama iz stava 2. ovog člana.